



## **Nunami Hivuliqtiuyut katittut Ottawa-mi ikayurnahugittugu Ukiuqtaqtuq**

OTTAWA, ON (Qiqaiyarluarvia 4, 2018) - Nunavunmi Hivuliqti Paul Quassa, Nunattiami Hivuliqti Bob McLeod unalu Yukon-mi Hivuliqti Sandy Silver katittut Ottawa-mi uumani havainiqmi uqariyumavlugit nunami nakuuyunik piyakhanut aadjikkiiktuni pidjutikhanut hilami aallanguqtirutinut, carbon-mut akikhainut, aulapkaidjutikhanut manikhainut, kanatauplu kavamangata atugakhainut pivalliadjutikhanut ukiuqtaqtumi.

Pingahut hivuliktiuyut ihuaqpiaktumik katimaqatigiyaait Kanatap Angayuqqaayuanga Justin Trudeau, nakuuyumiklu uqaqatigivlugit ukuat Manikhanut Minista Bill Morneau, Avatingnut Minista Catherine McKenna, Aulapkaidjutikhanut Minista Amarjeet Sohi unalu Crown-Indigenous Relations Ministanga Carolyn Bennett.

### **Aulapkaidjutikhanut**

Hivuliqtiit ilihimayaat taimaa kanataup kavamangapiliktut naunaittunik nakuuyunik nutaanik ikayuutikhanik aulapkaidjutikhanut talvani 2018 maniit ukiunganut atuqtakhanut. Uqaqtangit pilluagakhanut pihimmaaklutik ikayuutikhanut nakuuyuniklu atuqlutik ukununga kanataup kavamanganut aallanullu paanariiktunut ihuaqhilugit ayuqhautit nunallaami, auladjutinut, tuhagakhanut ingilradjutikhanullu aulapkaidjutikhanut akunngani nunani tamainnilu Kanatami. Piiklugit ayuqhautit ikayuutauniaqtuq mikhilaaqlugu akikhait inuuyaami Ukiuqtaqtumiutanut pidjutikhaqariami ihuaqtunik nakuuyuniklu maniliurutikhanut pivikhanillu pivalliadjutikhanut. Ihumaginiaqtait ihuaqtut manikhanut pidjutikhat uqariyauyuqlu katimangmata.

### **Hilap Aalanguqngatigut**

Kanataup kavamangata piyakhait pivalliadjutikhaanut Ukiuqtaqtumi Hungiutidjutikhanut Qanuriliurutikhanut, naunaikhimayumut talvani Pan-Canadian Framework ukununga NakuuyunutPidjutigivalliadjutikhanut unalu Hilaup Aallanguqtirutinginnun, uqariyauyut pilluagakhanut taimaa pingahut nunat pidjutikhaqarianginni hungiutilutik aallanguqtiliqtumi hilaptingni. Una ilihimayakhauyuq ukiuqtaqtumi taimaa hilaup aallanguqtirutinga piliqtumi.

## **Carbon Akikhainut**

Hivuliqtiit uqariyait carbon-mut akikhait naunaikhugillu aallatqiit pidjutikhat havaliktakhanut ukiuqtaqtumi. Tamaita pingahut nunat unalu kanataup kavamanga havaqatigiiktut taimaa pidjutait carbon-mut akikhainutangivallaangittumik mikivallaangittumiklu pidjutilimaittut nunamiutanut angikliyuumilugu tadjja akituvallaamut akiliqtuidjutinut inuuyaami nanminiaqatunilu havakpakhutik.

## **Ukiuqtaqtumi Atugakhanut Tunngavikhaa**

Hivuliqtiuyut uqaffaaqtangit piyakhariyanut pivalliadjutikhamut atugakhamut tunngavikhaanut ukiuqtaqtumut ihumagilluaqhugit piyumayainut nakuugiyainullu ukiutaqtumiut. Una ilgiyaa aivaktuutikhat havaktakhallu nuutirnirmut angirutikhat. Ikayuutikhaq Ukiuqtaqtumi Atugakhanut Tunngavikhaanut havakpiaktakhainut Kanatap piliuqlutik ihuaqtunik ikayuutikhanik nunani ihuaqtunut tamainnut aviktuqhimayuni naunaikhimaiyunut piyumayamingnut ikayuutikhanullu ihuaqtunut ukiuqtaqtumi maniliurutikhanut, naunaikhimayuni talvani Pan-Territorial Vision Ihuaqtunut Pivalliadjutikhanut anipkarutainut ukiuqtaqtumi hivuliqtinit 2017-mi.

Hivuliqtiit havakhimmaakniaqtut ihuaqhiyuumilugit piyakhat, naunaiyakniaqtaillu havaktauyut tugliani Ukiuqtaqtumi Hivuliqtit Katimayuarutaanut katimakpata Nunavunmi.

“Ukuat katimadjutit uqaqtinniaqtaavut aallangayunik ayuqhautigivaktaptingnik, ayuiqlugit aadjikkiiktut pidjutikhat, atuqlugit hakugiknivut ukiuqtaqtumi taimaa aallangayut piyumayavut ihumagiyavullu tuhaqtauyaanginni kangiqhiyaulutiklu nunakyuami,” uqaqtuq Hivuliqti Quassa, katimapkaivluni Ottawa-mi. “Naunaittut ikayuutikhat piyakhariyayut ukiuqtaqtumi taimaa aadjikkiiliriaptingni tamainnut Kanatami. Havakpiakniaqtugut havaqatigiikhimmaakluta hivuliqtiuvluta akhuurutigilugit ihuatqiyat piyumayait ukiuqtaqtumi ukiuqtaqtumiutaayunullu.”

“Piqaqtuq amihunik naunaittunik ayuqhautinik Ukiuqtaqtumut taimaa Kanataup ilihimayakhainut ikayuutigiyakhainullu. Quviagiyakkut ikayuqpiarumangmata havaqatigiluta naunaikhidjutigilugit piyumayaptingnik havaqatigiikhimmaaklutalu ikayuqatigiikluta,” uqaqtuq Hivulitqi McLeod.

“Aliahuktunga ilaulirama havaqatimnut ukiutaqtumi hivuliqtiuyunut Ottawa-mi. Aadjikkiiktunik ihumagiyaaqatugut uqaqtukhauyugullu kanataup kavamangani ministanut atauhiulugu nipivut. Atuqhimmaaktavut aallangayut pidjutit nunani, pilugit ukuat ukiuqtaqtumi ihumagiyayut havaqatigiikluta ikayuutaayuq uqarilugit piyumayavit nunakyuami pilugit. Ihuaqpiaktumik katimayugut quyagiyumayatkalu havaqatitka ukiutaqtumi hivuliqtiit uumunga pidjutigiyaptingnut,” uqaqtuq Hivuliqti Silver.

**Tuhaqtipkainikkut Uqaqatigivikhat:**

Hillary Casey  
Tuhaqtakhanut Titiraqtit  
Havagvia Hivuliqti Quassa  
Nunavut Kavamanga  
867-975-5059  
[hcasey@gov.nu.ca](mailto:hcasey@gov.nu.ca)

Charlotte Digness  
Tuhaqtidjutikhanut Tuhagakhanullu Tutqikhaiyi  
Ministat Katimayiit Tuhagakhanut Maliktakhanullu  
Nunattiami Kavamanga  
867-767-9140 hivayarvia 11092  
[charlotte\\_digness@gov.nt.ca](mailto:charlotte_digness@gov.nt.ca)

Sunny Patch  
Aulapkaiyi, Tuhagakhanut  
Havagvia Hivuliqtiup  
Yukon Kavamanga  
867-393-7478  
[sunny.patch@gov.yk.ca](mailto:sunny.patch@gov.yk.ca)